



Klubben på Meland ungdomsskule
v/ Sissel Agasøster
41612064

Frekhaug 11.11.2018

Til politikarane i Meland kommune.

Er det tenleg og fornuftig å flytte ungdomstrinnet på Rossland skule til Meland ungdomsskule? Er det til det beste for elevane å kutte i kontaktlærartettleiken og leggje ned kantina på Meland ungdomsskule?

Torsdag 1.11. 2018 kom budsjettforslaget frå rådmannen for 2019. Budsjettet inneheld store endringar, og tap for både helse-og skulesektor. Når det gjeld skulesektor så legg ein om store delar av skulestrukturen frå første til tiande trinn. Vi forstår at Meland kommune er i ein svært vanskeleg økonomisk situasjon, men konsekvensane av tiltaka er store.

Vi stiller mange spørsmål til heile framlegget, og framlegget om å flytte ungdomstrinnet på Rossland til Meland ungdomsskule, opptek oss sjølvstøtt særleg.

-Er det fornuftig med ei plutselig endring av skulestruktur i Meland kommune rett før vi blir Alver kommune?

- Skal ikkje omorganisering av skulestrukturen vera ein del av skulebruksplanen, og komma som eit resultat av gode prosessar?

- Er det fornuftig at ein allereie sprengt Meland ungdomsskule vil få eit auka elevtal med nærare 70 prosent på så kort varsel?

- Verken klasserom, spesialrom, kantine, inne- eller uteareal er dimensjonerte for ei så stor auke i elevtalet, korleis vil denne auka i elevtalet fremme eit trygt og godt miljø for elevane?

- For å få plass til dei nye elevane må ein kjøpe inn modulbygg som vil ta store delar av skuleplassen som vert nytta til positiv aktivitet både i friminutt og på kveldstid; er elevar og nærområde tent med det?

- Meland ungdomsskule har heller ikkje kroppsøvingsanlegg, noko som betyr at elevane må bussast rundt til andre anlegg i kommunen, er elevane og miljøet tent med det?

- Det blir også mange fleire elevar som skal ta buss til og frå skulen og som vil samlast rundt terminalen, som då kan bli ein arena for knuffing og utrygge situasjonar, kva gjer det med utrygge elevar, som det er fleire og fleire av?

- Vil ein tene nok på dette framlegget til at det skal vege opp for dei negative konsekvensane det fører med seg?

Endring av skulestruktur rett før vi blir Alver kommune.

For oss er det svært merkeleg å gjere ei endring i skulestruktur rett før vi blir Alver kommune. Eventuelle skulestrukturendringar må ein vente med no, og eventuelle endringar må vera gjennomtenkte. Ein skal ikkje redde budsjettet ved å endra skulestrukturen.

Utrygge elevar og endringar

Av ulike grunnar er det fleire og fleire utrygge elevar i skulen i dag. Utrygge elevar treng stabilitet, og tid på seg for å bli trygge. Ei plutselig omvelting med mange elevar på eit lite område er svært uheldig for slike elevar. Konsekvensen blir ofte at ein treng fleire ressursar inn mot enkeltelevar.

Kutte i kontaktlærartettleik

Bakgrunnen for å ha to kontaktlærarar per klasse på Meland ungdomsskule er ein avtale som har blitt forhandla fram i lokale lønsforhandlingar, og ei ordning som er til det beste for både elevar og lærarar. Klassestorleiken på Meland ungdomsskule er i gjennomsnitt på 25 elevar, noko som er høgare enn på alle dei andre skulane i kommunen.

Det har i dei siste åra vore ei stor auke i elevar som treng svært tett oppfølging, og fleire kontaktlærarar jobbar mykje meir enn avsett tid til å følgje opp desse. Dersom ein kontaktlærar skal følgje opp rundt 25 elevar vil ein ikkje kunne følgje opp elevane på ein god nok måte, og framleis ha helsa i behald.

Dersom ein får mindre tid til kvar elev vil det til sjuande og sist gå ut over dei stille elevane som lett forsvinn i mengda. Denne elevgruppa vil då bli taparane når ein kontaktlærar skal ta tak i alt det dei meir utagerande og krevjande elevane steller i stand, på grunn av at slike saker som oftast må ordnast med ein gong.

Nedlegging av kantina

Dersom elevkantina blir lagt ned er dette eit stort tap for elevane. Elevane våre jobbar sjølv i kantina med både sal og opprydding, noko som er nyttig lærdom å ta med seg vidare. Kantina er også den einaste samlingsstaden elevane har, i og med at Meland ungdomsskule ikkje har ein gymnastikksal der dei kan samlast. Det er heller ikkje alle ungdommane som har mat med seg på skulen, så dersom dei ikkje kan kjøpe mat i kantina går dei gjerne svoltne heile dagen.

Vi håpar verkeleg de som politikarar forstår at dette budsjettframlegget er ei svært dårleg løysing for elevane, og håpar at de finn andre måtar å få budsjettet i ballanse på.

Mvh

Klubben i Utdanningsforbundet på Meland ungdomsskule

V/ Sissel Agasøster